

四十二章經

夫為道者，譬如一人與萬人戰，挂鎧出門，意或怯弱，或半路而退，或格鬥而死，或得勝而還。沙門學道，應當堅持其心，精進勇銳，不畏前境，破滅眾魔，而得道果。

評曰：半路退者，自畫而不進者也。格鬥死者，稍進而無功者也。得勝還者，破惑而成道者也。得勝之繇，全在堅持其心，精進勇銳。學人但當一志直前，毋慮退，毋畏死，前不云乎，吾保此人必得道矣。法華云，吾今為汝保任此事，終不虛也。佛既爾保，何慮何畏。

觀藥王藥上二菩薩經

常念大乘，心不忘失，勤修精進，如救頭然。

評曰：當勤精進，如救頭然！今叢林早暮持誦，然誦其文不思其義，明其義不履其事，亦何益也！